

ЛҰИМА СЭРИПОС

20 декабря
2018 года
№24
(1186)

Общественно-
политическая газета
Ханты-Мансийского
автономного
округа-Югры

www.khanty-yasang.ru

E-mail: gazeta@khanty-yasang.ru

Основана 11 февраля 1989 года



Ты хурит Геннадий Степанович Райшев пӧслым ӧлы.
Кӧтыл хурит пӧслын ӧйка сӧв мирн вӧве. Яныг таквс ӧтпост
тав намхӧталӧ ӧлыс, ос ты кастыл рӧпитан колӧт суссылтап
щӧпитӧлвес. Анӧ ты намыӧ-суиӧ ӧйка ӧвылтыт нӧн 7
лӧпсыт ловиньтӧн.

Ты
номерт
ЛОВИНЬТӢН:

Лӧтӧанув
янытлан тӧл
ӧхты

2

Ӗмас
номтыл мирн
нӧтӧгыт

5

Хурит пӧслум
нӧврамыт
янытлавӧсыт

10

Тав
нӧпаканӧ
ловиньтавет

12

Ащирма
ӧйкат ӧсувт
мӧйлысыт

16

Ләтнәнуw янытлан тәл ёхты



Ишхйпын мәт вим журн



Округ кўшай нә Наталья Комарова тәл сыс вәрум рупатаныл урыл потыртамет щәнь ләтнәнуw урыл ос потре олыс. Тав ләвме щирыл, мән округув ос ЮНЕСКО сәв щёс акван-хонтхатыгламаныл порат щәнь ләтнәт элаль суйтнә мәгсыл маныр вәруңке, акваг номсахтасыт.

Акв щирыл хансуңке эри

Ань ул таимәгсыл ООН колт рупитан яныт кўшаит мотыт 2019 тәл сасса мирыт ләтнәныл янытлан мирхал тәлыт ләвсаныл. Мәныщи, ханты ос ёрн ләтнәт хот ул вос ёрувлавет, тәнанылтыл мәхум акваг вос потыртәгыт, ты вәрмалъ хосыт сәв рупитаңкевә эри.

РФ Президентув Владимир Путин Ханты-Мансийск ўсн ёхталас. Тонт Совет по национальным вопросам сапранит Наталья Комарова, кўшаюв, ләтың ләвыс, алфавитыт урыл федеральный сәккон вос пирмайтаве, кәсың мир тәнти акв алфавит вос оныщәгыт.

Ань оlnәв порат сәв учёныит тәнти алфавит вәрәгыт ос нәпакыт таратәгыт, мот мәхум тәнаныл ловиньтаңкевә ат вәрмәгыт, ат торгамтыяныл. Тох ул вос олыс, таимәгыс яныт

кўшай нә Президентув ты урыл ты потыртас. Тонт Владимир Путин щәнь ләтнәт ўргалан Фонд вәруңке ләвыс. Ос нәврамыт мәгсыл ханищтан программат, нәпакыт йильпииг вос щәпитавет.

Ты тәл Югра мәвт нәпакыт ловиньтан мәгсыл Концепция пирмайтавес. Ты хосыт 2019 тәлт сасса мирыт мөйтаныл, пәс потраныл ос ань хаснә потрыт урыл мирн потыртаңкевә, тәнаныл ловиньтаңкевә эри. Кўшай нә ләвыс, ханищтап департаментыт рупитан хотпат тамле вәрмалъ вос щәпитәгыт, таквсы суқыр этпос овыл хоталт сасса мәхум ләтнәныл урыл ос пәс потрыт, мөйтыт урыл урокыт вос вәравет. Мотыт тәл манти ләтнәнуw янытлан ос ўргалан вәрмалъ овылтаве.

Мәныщи мәхум, нән нәнти ос роттыг ул оlnә, нәвраманын, апганын ёт торген мәныщи ләтнәл

потыртән, вос хүләгыт, вос ханищтахтәгыт. Манти тән ётаныл потыртаңкевә ат те патәв, нәмхотты кўшаин манос школан тән ат ханищтавет.

Щәмьят ёмас оlnә колыңыг ёмтәгыт

Ювле хультнә тәлт колыт ўнттын ос ёвтнә мәгсыл 26 млрд солкөви бюджетныл тәстувес, ты 12 сөтыра 879 щәмьят ёмас колытын вәнтлысыт. Округув сака сәв мәхум балокуг ләвнә колытыт олыс. Ань тамле колтәгыт олныл тәставет, тән ты субсидия-олныл ёмас кол ёвтәгыт. Ты олнаныл ат те төвылхатәгыт, ипотека щирыл винә олнаныл тәнти тув нәтуңкевә вәрмәгыт. Ань сәв щәмьят ты субсидия-олныл кол тах ёвтәгыт.

Ты элы-пал округув янытыл лов сөтыра сәвит балокуг олыс. Ань Сургут, Нижневартовск ўсыгт, Сургутский, Советский, Хәльўс районытыт тәл оигпан мус пуссын хот-ёхтавет, щәмьят мот колытын вәнтләгыт. Ос Нягань, Пыть-Ях, Мегион, Нефтеюганск ўсыт ос Нефтеюганский район ты тәл ат алымәгыт. Ос

кўшай нә ләвме щирыл, мотыт тәл пуссын ты колытыт оlnә мәхум йильпи колыңыг ёмтәгыт, пәс балокуг пуссын хот-нуясаптавет, шар аква ат хультуптаве.

Ты коньпал сака пәсыг ёмтум колыт округув иң сәв олы, тән руш ләтнәл «аварийное и ветхое жильё» ләвавет. Ювле хультнә тәлт 154 сөтыра кв. метра сәвит пәс колыт хот-лөсталавәсыт. Ань миркол кўшаит кәсың тәнти мәнылт ты щәмьят ёт ос вос рупитәгыт, тәнанылн ёмас кол ёвтуңкевә вос нәтәгыт, мот мән вос вәнтлуптыяныл.

Наталья Владимировна ләвыс: «Мирколт рупитан хотпа ат те төвылхаты, мән тамле мәхум хонтәв, ты вәрмалъ молях эри вәруңке. Пәс колытыт олуңкевә пиыщмаң, төват ёл ты лоньхатәгыт. Тамле колытыт мән нәврамың щәмьят оlnәгыт. Ань иң 7% сәвит пәс колытыт мәхманув оlnәгыт».

Тыи ос мот вәрмалит округ кўшәянуwн вәравет, сәвсыр программат хансавет ос та хосыт олныт тәставет.

Галина КОНДИНА

Кәркам хөтпәт янытлавеһыт

Ты этпос сәтыт хөталәт Ханты-Мансийск үст округув 88 тәлә төвлүме кастыл мак ёмас тәла вәрнә махум янытлавеһыт. Сәвсыр мат рүпитан махум почётный грамота нәпакытыл ос мағлын тагатын пөһытыл майвеһыт, төваныл яныг намыл ләввеһыт.

Округ кұшай нә Наталья Комарова тох ләвыс: «Юграмәвтсакасәв тақсар, номтың, сымың махум өлэгыт. Мән аны тыхөтал тәнаныл ты янытлыянув. Ты кәркам әлумхөласаквет сәвсыр мат рүпитәгыт.

Мән, округт өлнә мир, ятил лүйи матев сака әруптылүв, таимәгыс халанувт юртыңыш өләв, сәв ёмас, әрнә тәла вәрәв. Мөһыт тәл округувт Колтағыл янытлан тәлыг намаявес. Кәсың шәмәя сөтыңыг, шуңыңыг вос олы!»

Нәлолов нәврамың нә Светлана Белекова (Октябрьский районт олы), Сургутский районт өлнә ат ос нәлолов нәв-

рамың нәг Елена Бикмурзина ос Татьяна Корсакова, Ханты-Мансийск үст өлнә сәт нәврам янмалтам нә Елена Миропольцева ос Нефтеюганск үст өлнә ат нәврамың ома Лариса Осипова «Материнская слава» мөталил майвеһыт.

Лянтор үст искусства школат рүпитан хаништан нә Лилия Аитова «Заслуженный деятель культуры ХМАО-Югры» яныг намыл майвес. Валентина Илькова (Нефтеюганский район), Любовь Семисынова (Советский район) ос Яна Юркевич (Сургут үс) ос тамле намыл ләввеһыт.



Е.Д. Айпин янытлаве

Ишхипың утыт вим хури

Төва хөтпәт «Заслуженный работник образования Югры», «Заслуженный работник ЖКХ Югры», «Заслуженный работник нефтегазодобывающей промышленности автономного округа» ос мөт намытыл майвеһыт.

Ты махум халт ханты хум, округ Дума депутат Еремей Данилович Айпин янытлавеһыт, «За выдающийся вклад в

социально-экономическое развитие автономного округа» наппа премиял майвес.

Махум янытлым юипәлт, тәтем ёмас концерт олыс. Әргын-йиквнә янге-мәне округ янытыл өлнә үһытныл ос пәвлытныл әхталасыт, маттем та әргыһыт ос йиквһыт, тәтем та хәһнәһыл, тәтем та хаништымат.

Светлана МАТВЕЕВА

Тынакт ос таджикыт ләтңаныл хуһсүв

«Югра многоликая» нәпак хансум махум сака ёмас тәла вәрәгыт – округт өлнә мирыт щәһә ләтңаныл янытлыяныл, сәвсыр хөнтхатыглапыт вәрыгләгыт, кәсың әһмәт исвәһә пәләмтәләгыт.

Мөһты тәл ханты ләтың урыл потыр олыс, аны ос таджик махум щәһә ләтңаныл хуһтамласүв. Ялпың исвәһә тәнанылн та майвес.

Таджик мир халт сәв поэт ос нәпак хәһнә хөтпа олы. Ты пәс йис мир культураныл сака пұмыш - тәһти маснутыл өләгыт, пәс потыр, йис мөһт оһыщәгыт, йиквуңкве, әргуңкве хәһсәгыт.

Тәһ «Вахдат» наппа национально-культурный объединение оһыщәгыт. Тувыл нәт ос хум хөтпәт әхталасыт. Нәт супаныл сәвсыр

хорамыл юһтым өләгыт, шар нас вәһәгыт. Ты кол кұшай вәһын хум Умарбек Сафаров такви стиханә таджик ос руш ләтңыл ловиньтасанә. Акв стихе намаястә «Ома». Хум ләви, ома – ты мә янытыл мак хөтпа, таимәгыс тав ома урыл сәв щәһ хансыглас, аны ты хөтал мус хансы, ома тә улылыяһә.

Агит ос пыгыт Омар Хайяма стиханә таджик ос руш ләтңыл ловиньтасыт. Тувыл тәһти йикваныл маттем та йиквһыт, акв хум койп рәтыс, мөһтан ос сәңквылтас.



Ханты мир нәпак хәһнә әква М. К. Волдина тох ләвыс: «Ам сәв мат өлсум, мә әһсум, вит әһсум – Норвегият, Францият, Японият ос мөт мат яласасум. Ёмас махум кәсың үст, кәсың пәвылт өләгыт, ам әтум пуссын сымыңыш потыртәгыт. Германият минамум порат, номсысум, хумустув минәгум, тамле яныг хөһт олыс. Тув әхтысум,

ам нупылум пуссын ёмас самыл сусһыт, сома хөһт әһтим олыс. Аны ос таджик махум әт потрамәв, аквәһт йикващләв, үһлахөһв. Сәвсыр мирытт өлнә ятил махум, халанынт юртыңыш өлән, ёмас номтыл акван-хөһтыглахтән, пус кәт, пус ләгыл өлән».

Светлана РОМБАНДЕЕВА

Элн үнлын павлыт ищхипың ут тёрквәлгыл ős тах вәравет

Ты йист мән сәвсыр ищхипың утыт
Оньщим олукв та патсүв. Элн үнлын
касың мән павыл мус интернет тотнэ
тёрквәлгыт та хартавет. Ань ты рүпата хумус
вәраве, ты урыл потыртан магсыл кұщайт
округ мирколт яныг сапрәни вәрыгласыт.

Овыл ләтың округ
кұщай нәв **Наталья
Комарова** ләвыс. Тав
потыртаме щирыл, ань
округувт олнэ махум
пуссын интернет вос
оньщегыт. Матыр нәпак
ловиньтаңкве, йильпи
тәлан ханищтахтуңкве
манос документ-нәпа-
канув вәруңкве, тот
щар пуссын рөви. Ань
таймагыс ты рүпата
молях ос ёмашакв вә-
руңкв эри.

Ты яныг кұщайов юи-
пәлт **Эдуард Лебедев**
потыртас. Ты ойка сәв-
сыр информационный
технологият уральтым
рүпиты. Тав ләвыс, 2030
тал мус округувт янытэт
ты рүпата тах вәраве.
Ань программа хансым
олы, руц ләтңыл тамле
намыл хасвес – «Ин-
формационное общест-
во ХМАО-Югры на
2018-2025 годы и на
период до 2030 года».

Соль ман интерне-
тыг ләвнэ йильпи ищ-
хипың ут тох ёмашакв
рүпиты, Наталья Кома-
рова ты урыл Хальүс
район Хулюмсүнт павыл
кұщай хум титыглаңкв

таңхыс. Хулюмсүнтыт
ты торыг павыл мир-
колт Ярослав Ануфриев
үнлыс. Тән Наталья Вла-
димировна ёт видео-
связь щирыл потыр-
таңкв номсысыг. Ос
матрыг эрнэ порат
Ярослав Викторович
камератэ рүпитаңкв
хот-пойтыс. Кұщайов та-
кос ләви: «Хулюмсүнт,
Хулюмсүнт.» Ювле
нәматыр потыр әтим.

Тувыл **Владимир
Фомин**, Хальүс район
кұщай хум, потыртаңкв
патыс. Владимир Ива-
нович ләвыс, ань мотыт
2019 тәлт Саранпавыл,
Лопмус, Няхщамволь ос
Кульпас павылт олнэ мир
пуссын молях рүпитан
интернетыл вәравет.
Тонт сотовый связь ős
ёмашакв рүпитаңкв
паты.

Тав юи-пәлэт **Ярослав
Ануфриев** потыртас.
Хулюмсүнт павыл
миркол кұщай ләвыс,
павланылт ань ущты
варим йильпи ут сака
ёмашакв рүпиты. Мо-
щёрт пүльница, садик,
школа пуссын опто-
волокну-квәлгыл тах



хартавет. Ань тот павлын
махум ос няврамыт пус-
сын щәгтым олэгыт.

Элалы кұщайт няв-
рамыт ханищтахтын
колледж-колыт урыл
потыртаңкв патсыт.
Ань округувт онтолов-
хуйплов тамле кол рү-
питэгыт, тән сәвсыр
яныг үсытт олэгыт.
Няврамыт тот ань мощ
мөт щирыл ханищтаңкв
тах патавет.

Ты урыл потырта-
маныл порат сапрәнит
үнлум акв кұщай хум
ләтың вөвыс, тав тох
потыртас. ЖКХ мāt
сәвсыр эрнэ рүпата
вәрнэ хөтпат ань щар
ат төвылхатэгыт. Кол-
леджит няврамыт мөт
эрнэ специальноститн
ős вос ханищтавет.

Тав ты колыт рү-
патаныл пуссын ураль-
тасанэ, щар нәмхөт ЖКХ

рүпата вәрнэ магыс
пыгыт ат ханищтавет.
Мөт маныл ёхтум хөтпат
тув рүпитаңкв вивет, ос
тән ёмашакв рүпитаңкв
ат хәсэгыт.

Ты хумн Наталья Ко-
марова ләвыс, щар сөль,
төва специалистыт сака
кос эрэгыт. Образование
департаментыт рүпитан
хум Александр Гомзяк
ләвыс, мощёртын ма-
хум мөт рүпатан ха-
нищтан магыс сәвсыр
организациятт йильпи
налыман кол тах пун-
савет. Махум тот туп хөт
этпос ханищтахтуңкв
патэгыт. Хотьют кәса-
щи, тав юн олым, ин-
тернет хосыт ханищ-
таңкв патаве. Тонт эрың
сәвнув мир рүпатаңыг
ёмтэгыт.

**Валентина
ХОЗУМОВА**



В.Боженко - варум хури



Ищхипың мāt вилм хури

КҮЩАИТ РҮПАТАНЫЛ

Ёмас номтыл мирн нётэгыт



Вят сәграпнал этпост օвыл хօталօт Ханты-Мансийск үст хұрмит мирхал форум օлыс, руц щирыл ты вօрмалъ «Гражданские инициативы регионов 60-ой параллели» лаввес, ты нётмил вօрнэ тօла хұрум хօтал рұпитас.

Ты тօл Россият волонтерыт янытлан тօлыг лаввес. Волонтерыт – ты мирн нётнэ хօтпат, тօнки рұпатаныл коныпал савсыр ёмас тօла вօруңке алымёгыт. Хотьютыт тыг ёхтала-сыт ос маныр рұпата тօн вօрсыт, ты урыл кұщайт потыртасыт.

Ляххал тотнэ колн общественный ос внешний связь округ департамент кұщай Константин Репин, мирн ёмас вօрмалъ вօрнэ фонд кұщай хум Яков Самохвалов ос

Евразия мօхум касыл комитетыт кұщай хум Владимир Волошин вօвиньтօлвёсыт. Тօн лавсыт, округувн Норвегия, Дания, Швеция ос Финляндия мօт хօн мօнытныл мօхум тыг ёхталасыт.

Мирн нётэгыт

Ты сапрօнин каснэ хօтпат, некоммерческий организацият ос мирн нётмил вօрнэ мօнылат мօхум акван-атхатыгласыт. Нётмил вօрнэ элумхօлас – ты та

хօтпа, хотьют тօрвитың порат акваг ляпат օлы, хұлтнэ лօтың лօви ос туп мирн нётым օлы.

Ты сымың мօхум элумхօласн нас тох нётэгыт, рұпатаныл мօгыс олн ат выгыт. Тув савсыр яныт тօл хօтпат хасхатым օлօгыт. Тыимօгыс округувт ты касыл щёпитым колыт пұсвёсыт, руц щирыл тօн «НКО - некоммерческие организации» лававет. Мирн нётнэ рұпата ань тօн вօрёгыт.

Ты мօхум тыт тօнки халанылт вօйхатасыт, тօрвит вօрмаляныл урыл потыртасыт ос рұпатаныл ёмашакв вօрнэ мօгыс ханищтап щёпитօлсыт. Ань ты тօл пуссын аквёт нёлловсօт хօт элумхօлас ты тօлат рұпитаңке кօсашасыт, сав хօтпа интернет хосыт хасхатасыт.

Каснэ вօрмалъ урыл потыртасыт

Владимир Волошин ты урыл тох лօвыс. Ань юи-օвыл тօлыт мօхум мօгыс савсыр каснэ вօрмалъ акваг щёпитօлаве. Кօсашан хօтпат вօтихал акван-атхатыглօгыт, халанылт ёраныл арталօгыт. Ты

хосыт хօтпа пұстагыл օлы, мօрсың порат агмыл ёмты.

Школатт нօврамыт օс мօнытօгыл нёнса-лахтуңке ханищтавет. Тот тօн хайтыгтօгыт, кол кйвырт щёпитым вит вօңхат пувлօгыт ос контовтыл тахсёгыт. Россия янытыл савсыр мօт акваг касылыт щёпитօлавет. Нօврамыт, яныг хօтпат аквтем тув ялантօгыт.

Тувыл ань округувт савсыр организацият тօнки халанылт օс касылыт щёпитօлօгыт. Ты хօтпат акваг пұстагыл օлօгыт ос тօнки рұпатаныл ёмшакв вօрияныл. Мօлты тօл савтамле организацият касыл вօрыгласыт. Ты тօл хօт этпос сыс акв млн. савиткем элумхօлас хасхатасыт ос халанылт кассыт. Тօн пуссын хօтпанкем савсыр регионытныл օлօгыт. Кօсың тօлныл савнув хօтпа касуңке ёхтօгыт, мօхумн ты вօрмалъ сака мұсты. Тувыл ань Россия янытыл китхуй-плов млн савит агмыңмосың элумхօлас օлы. Тօн օс ат ёрувлавет, ты вօрмалын акваг вօвиньтօлавет.

**Николай
МЕРОВ**



Сытам агм урыл потыр олыс



Анна Новоженова ос Андрей Петровец

Ват саграпнал этпос овыл хоталэ Россиявт СПИД агм урыл потыртан хоталыг лававе. Ты кастыл ляххал тотнэ махум Ханты-Мансийск ус мирколн акван-атыглавёсыт. Лёккар хотпаг Андрей Петровец ос Анна Новоженова «СТОП ВИЧ/СПИД» намба олум вармаль урыл потыртасыт.



ссияныл. ВИЧ – ты инфекционный агм, тав сака пылыщман, тавёныл нэмхуньт пусмалтахтуңкве ат рөви. Ос тэрпи айнэ хотпа сав тал элаль иң олуңкве вёрми».

Тамле агмыл янгыщ рупитан хотпат хәхтавет

Тамле тәла таимәгыс вәрыглаве, ань округт оlnэ мир ты пылыщман агм урыл вос вәгыт, потыр вос хунтлэгыт, алпияныл уральтан магыс тованакт келп вос мыгыт. Тамле агм оlnэ махум ул вос люкамтавет, тананылныл пилуңкве ат эри.

Анна Новоженова лавыс: «ВИЧ агм урыл касың янгыхотпан вәңкв эри. Ты агмыл махум хумус хәхтавет, хумус ургалахтуңкв эри – номим вос онь-

Ты тал сыс округ янытыл оlnэ СПИД агм тара-паттын ос пусмалтан центр колт рупитан махум вәрум тәланыл хосыт таи оспаттысүв – 8 сөтыра арыгтем хотпа халт 51 элумхолас палт тамле агм хонтвес. Лёккар нэ элаль тох потыртас: «ВИЧ агм оlnэ махум халт янгыщ рупитан нэт ос хум хотпат тарапаттым олэгыт. Савсыр организациятын мән вәтихал ялантәлэв, махум эт потыртэв,

матыр китыглахтын латың оньшөгыт те, тән этаныл потрамёв, савсыр эрнэ вәрмалит хултэв. 1 сөтыра 200 хотпа магыс 80 потыр щёпитәлсүв. 300 арыгтем хотпа анализ вәрнэ магыс келп мисыт. Ты агм урыл щёмыятын потыртан магыс Нефтеюганск ос Нягань үст «Ленточный лабиринт» ёнгил вәрыгласүв. Төванув нъярамыт ёнгалтасаныл – мөйтақың витыл сыресыр хурит вәрсыт, тувыл пуссын аквёет номтыл рупитасыт. Ос ты халт лёккаранув щань-ащит эт потрамаңкве алымасыт – анализ магыс келп висыт, ВИЧ агм урыл кина-охса суссылтасыт.

Касыңжёмт тамле тәла порат нъярамыт татем ёмашакв ўщлахтэгыт, ёнгасэгыт, хайтыгтэгыт. Яныгхотпат ос эрнэ тәла вәрёгыт – алпияныл уральтэгыт, элаль пустагыл оlnэ магыс потыр хунтлэгыт».

Округ янытыл номтың лёккарыт рупитэгыт

Андрей Петровец лавме щирыл, яныг таквс этпост Москва үст ВИЧ/СПИД центр колыт рупитан лёккарыт магыс «Лучший СПИД-центр» намба IV всероссийский конкурс вәрыглавес. Округувт ты агм торыг рупитан махманув тув ос ялсыт, кассыт. «Знать, чтобы жить!» касыл мән лёккаранув нөх-патсыт.

СПИД центрыт ос медицинский профилактика Центр мят рупитан лёккарыт Ханты-Мансийск үст школат хаништахтын

агиришит-пыгришит ос студентыт магыс VII конференция вәрыгласыт, тох намайласныл: «Здоровье как образ жизни». 16 мәнлат махум исследовательский потрыт хассыт. Ань пустагыл оlnэ магыс хумус олуңкве эри, маныр тәңкве. Тән лавнэныл щирыл, касың хотал хутсаңкве ос нюнсалахтуңкве эри. Тувыл лөль номтыл ат эри ёмыгтаңкве, мөт хотпа урыл тәрвитың номтыт пуссын хотёрувляңкве эри.

Мәнлат махум татем сэржэрыг рупитасыт, потраныл мұсхал щирыл щёпитасаныл. Мән тән этаныл ос мощ потрамасув, янытласанув, сымың латңыл лавсанув.

Юи-овыл латың Андрей Петровец тав лавыс: «Ань йильпи тал ты ляпамас, махум пуссын мүйлуңкве патэгыт, халанылт хонтхатыглаңкве, эруптахтуңкве патэгыт. Сав хотпа тәнут пасан тармыл пиннэныл элыпәлт номсахтэгыт, тав юв-тәңкве хөйхаты ман ати, ёмашакв сунсыглыяныл, атыньтыяныл. Ос хунь хотпа эт вайхатэгыт, акванхонтхатэгыт, шар ат номсэгыт, тав этэ акв пүтин хуюңкве рөви ман ати. Мән элы хоталув урыл номсуңкве патэв те, мори олуңкве, ўщ вәнэ хотпа ляпан тартуңкве ат те патэв, тонт тах ос сав тал пустагыл олуңкве вөрмёв. Таяныт ёмас вәрён, нанти номтыл олән, колтагыл махманын эруптән, сөтыңыш, щуниңыш олән».

**Светлана
МАТВЕЕВА**

Самын патум поратэ мот щирыл хасвес

Мирн ванэ ос катыл хурит пöслын ойка Геннадий Степанович Райшев яныг таквс этпост намхоталэ öлыс ос манах талэ тöвлыс, ман аты торгамтылүв. Тыи тарапаттын магыс тав хурит пöслын мастерской-колн щалтсасум, тот портыртасмён ос йильпи пöслум хуриянэ суссанум.

Геннадий Степанович Ханты-Мансийский район (пёс порат Самаровский район) Сивохрап павылт 1933 талт яныг таквс этпос öвыл хоталэт самын патыс. Ты пора öвылтыт щаняге-ащаге öс лавыгласыг, ос матрыг намнэпакёт 1934 тал аквта этпос ос нёлоловхуйплов щисла хансыма. Метрика-нэпаке аман хот-пентвес, аман тув мот щирыл хултвес, мот хотал ос тал ты намнэпакен та хасвес.

Пёс порат мань павылт миркол ат ке öлыс, тот самын патум няврамыт намнэпа-

кыл ётыл уш хасвесыт. Таимагыс няврам мак самын патум этпосэ ос талэ хот-ёрувлалвес ос мот щирыл хасвес.

Тонт рүпитам хотпатыл ань нэмхотьют атим, павылкве öс туп наме хулытыс. Ты урыл ойка мовалалым лавыс: «Ам ань тох та öлэгум, тал сыс кит щёс намхоталум янытлаңкве вёрмёгум. Ты тал яныг таквс этпос öвыл хоталэт 85 талум тöвлыс, мощ ётылнув нёлоловхуйплов хоталт, насати, 84 талумт иң та öлэгум».

Геннадий Степанович касың хотал мастерской-колэн ёхталы ос



тал сыс сав хурит пöслы, тувыл тот манос мот мат сыресыр суссылтапыт варавет. Ань ам ёхталамум порат öс акв хури пöслум. Ты элы-палт тав тамле хурип хури Сирия маныл ёхталам муй хотпатн муйлуптастэ. Тувыл та хуритэн маньыр пöслыс, иң номитэ, таимагыс акв тамле йильпи хури пöслуңкве номылматас.

Ойка лавме щирыл, тав сав тал мот мирыт халт öлнэтэ сыс касың мир янасыг ханищтас-тэ. Тав тананыл так-ви номсахтынэтэ щирыл пöслыянэ. Та пöслум хуритэт, нан касалылын ман ати, мошцаңыл масхатам ёрнхум люляхöлы ос тав пöхатэт ханты нэт сахил масхатым люлөгыт. Саран манос ханты хум ке öлыс, тав мощ мот щирыл люляхöлым тэнатэн пöслынуваге. Тав пöслум щуртмилэтыл касың элумхöлас хашхаты.

Наталья Фёдорова, тав этэ рүпитан нэ, лавыс: «Геннадий Степанович акв тал сыс яныгсат арыгкем хурит пöслы, тувыл суссылтапыт вярнэв порат сав хуритныл лов арыгкем туп хулытуптаңкве эрэгыт. Тованакт сака хоса номсахтэв, пуссын суссылтаңкве ос касың

хури öвылтыт янас потыртаңкве эри.

Аньнув öс акв йильпи суссылтап щёпитасүв «Геннадий Райшев: Новые работы. Дары-2018». Аtpан пöслум хуриянэ ман махумн суссылтыянүв. Тот Тöрум ос ма-вит хумус тавён сусхатэг, тувыл öлупса накыт пуссын тув пöслым öлэгыт».

Ты элы-палт «Искусство эт» намаим тэлат öлсыт. Геннадий Степанович такви вярнэ рүпататэ урыл муй махумн потыртас ос тананыл пöслуңкве мощ ханищтасанэ. Рүпитан колэт тал сыс сав ханищтан щёсыт варыглавет.

Ойка төва пöслум хуриянэ Салым павыл школан муйлуптасанэ, мöлты тот öлнэ искусство школа тав намётыл пинвес. Хунь ваглуw, эрың тувыл тах хотты няврам Геннадий Степанович холът хурит пöслуңкве паты. Ань так-ви лавнэтэ щирыл, тав иң кисхатым öлы, ань савыңпалэ няврамыт туп ишхйпың утыл пумщалахтэгыт.

Ман Геннадий Степанович намхоталэтыл янытлылүв, пустагыл сав тал вос öлы, сав шунь, сав сöt.

Тамара МЕРОВА



Тэнут, пормас тыналаңкве сосса махум ős ёхталасыт

Мән округув 88 тәлә төвлын кастыл Ханты-Мансийск үст ват сәграпнал этпос 7-9 хоталытт «Товары земли Югорской» наппа суссылтап җылыс. Тэнут ос пормас тыналан вәрмалы касың тәл 1995 тәл пәсныл щәпитәләве. Сәвсыр үсытт, пәвлытт җлнә махум тәнки вәрүм тәнүтаныл, җнтум пормасаныл тыналаңкве тыг вөвыглавет. Ты тәл 220 арыгкем предприятият ос общинат тыналахтуңкве ёхталасыт.

Үст җлнә мир щак-вит, нёвиль, хұл, мүнйт, сәвсыр су-венирыт, пұркат, үйхул совыт ос мот пормасыт, тәнүтыт тот ёвтсыт.

Овыл хоталәт округ кұщай нә Наталья Комарова ос Сирия мот хон мәныл ёхталам мүй хотпат суссылтап суссыт. Наталья Владимировна мүй хотпатн ләвыс, выставкат туп мән округувт вәрим тәнүтыт ос пормасыт суссылтавет. Югра - щёлың мә, тыт сымың ос кәркам мирыт җлэгыт, тән атың тәнүтыт, ёмас пормасыт вәрэгыт.

Аквта порат округ кұщай нә Н. Комарова «Лучший товар Югры» наппа касылт нөх-патум хотпат янытласанә. Хот номинацият нөх-патум махум 300 сөтыра солкөвил майвёсыт.

Октябрьский рай-он Приобье пә-вылт рұпитан «Лаңки» наппа община хұл алыщлан магсыл олныл майвес. Үйхул янмалтан ос нёвиль тыналан хотпат халт Нефтеюганский район Пойковский пәвыл «Солнечный» наппа предприятият рұпитан махум янытлавёсыт. Нижневартовский район Излучинский пәвылт җлнә хум Владимир Водопьянов пил вәтнә, ләхыс, пәкв атнә магсыл олныл тәстувес. Үйхул совыт тыналан махум халт Татьяна Скокова нөх-патыс. Тав Нижневартовский район Охтеурье пәвылт җлнә зверофермат кұщай нәг рұпиты. Су-венирыт вәрнә хотпат халт Нижневартовск



Н.В. Комарова ос Т.Н. Скокова

үсныл җлнә нә Ирина Быкова янытлавес.

Наталья Комарова ты махум пуссын янытласанә ос элалы ёмашакв рұпитаңкве ләвсанә. Ос Россия «Конституция» наппа щар яныг сәккон 25 тәлә төвлын кастыл тув ёхталам мир пуссын янытласанә.

Хальүс район рұ-питан сосса махум общинат суссылтапн җс вөвыглавёсыт. Тән ётаныл Хальүс район мир-кол кұщай Владимир Фомин ёхталас. Районт рұпитан общинат урыл тав таи ләвыс: «Ты суссылтапн «Элалы», «Рахтынья» сосса махум

общинаг ос Саранпә-вылт җлнә «Рутыл» наппа предприятие, «Саранпаульский» наппа сәлы үрнә компаният рұпитан хотпат тәнки вәрүм тәнүтаныл, пормасын тыт тынала-сыт. Мән районувт тәлы ләңхыт иң ат вәрвёсыт, тыммагсыл мотанув ёх-туңкве ат вөрмысыт.

Сәв тәл сыс «Си-бирская рыба» наппа хұл щәпитан завод тәнки вәрүм хұлың тәнүтаныл тыг тотыгласыт. Тән нялк, солвалың хұл, консерва пәнкат ос мот тәнүт суссылтап тыналасыт. Үи-овыл тәлыт хұл щәпитан завод мұс-



Хальүс район махум



В.И. Фомин ос А.С. Глухих



Н.К. Тасманова агитэ ёт



Н.С. Андрейченко



Н.М. Толстова

халыг рүпитаңкве ат вөрми. Ам ты вәрмалъ урыл округ кұщаит акваг потыртэгум, завод элалъ рүпитан магсыл оln кос вөвөгум, ты мус олныл аты майвесүв. Мошёрт округ кұщаит ёт сапрәнин акван-атхатэв ос ты завод урыл тах потыртэв. Эрың мотыт талт тан вәрум тәнутаныл ос тах тыг тотыянүв».

Владимир Фомин пил вәтнэ вәрмалъ урыл ос потыртас. Ань Хальүс районт 24 павыл олы. Тот оlnэ мир туи ос таквсы порат сав пил вәтэгыт, сав лахыс, пакв атэгыт. Тувыл элалъ тыналаңкве ат вөрми-яныл. Ань кұщаит кәсың яныг павылт пил пирмайтан кол вәруңкве номсэгыт, тот оlnэ махум пиланыл, лахсаныл тув вос тыналыяныл.

«Саранпаульский» намп-а компаният рүпитан махум пүркат, тапочкат тыналасыт. Тот рүпитан нэ Наталья Михайловна Толстова лавыс:

«Мән кәсың тәл ты суссылтапт рүпитэв. Миннэ лёңхув сака хоса, вәт саграпнал этпост мән оlnэ мавт машинал яласан лёңх иң атим, тыммагсыл нёвыль тыг ат тотыглэв. Мён кит хөтпаг тыг ёхтысамён, Саранпавылныл Приобье павыл мус вертолётыл тыламласмён ос Ханты-Мансийск үсн машинал йисмён. Манасәвит пормас әлмтаңкве вөрмысамён, тасәвит тыг та тотсумён. Мот хөтпат тай машинал ёхталэгыт, тыммагсыл сав тәнут ос пормас тыт тыналэгыт. Саранпавылт мащтыр хөтпат юнсахатуңкве сака хә-

сэгыт, тән юнтум маснутаныл махумн ёмашакв ёвтавет. Няврам пүркат хүрум сөтыра солкөви тынаныл олы, мот пүркат 15 сөтыра солкөвил тыналасүв».

Ольга Константиновна Филиппова Хальүсныл ёхталас, тав «Элалъ» община кұшаиг рүпиты. Нэ савсыр маңыщи, ханты пормасыт ос сувенирыт тыт тыналас.

«Рахтынья» общинат рүпитан махум ос кәсың тәл тыналахтуңкв вөвыглавет. Ты тәл тән солвалың хүл, нялк, тосам нёвыль тотыгласыт. Ысың махум тосам нёвыль ат тәшинтасыт, тамле тәнутыл сака пүмшалахтасыт.

Кондинский районт рүпитан сossa махум общинат тәнки вәрум тәнутаныл үсн ос тотыгласыт. «Кама» намп-а община савсыр пилың пәнкат суссылтапт тыналасыт. Кұшаиг тот Николай Сергеевич Андрейченко рүпиты. Тән хүл алыщлым, пил вәтым ос мүй хөтпат вөраяңкве, хүл алышлаңкве тотыглым оln сәлэгыт. Николай Сергеевич лавыс, тән лов тәл ювле хультум порат община вәрсит. Ань 27 элумхөлас тот рүпитэгыт. Алтай, Кама

ос мот маңь павылквет оlnэ маңыщи, ханты хөтпат хүл алыщлым тот рүпитэгыт. Овлэт туп хүл алыщлым оln сәлсыт. Тән ань мүй махум Кондинский районын үшлахтуңкве, хүл алышлаңкве вөвыглыяныл. Түр вәтат вөрколът үнттысыт. Ань йильпи тәл янытлаңкве ос нас үшлахтуңкве Екатеринбург, Пермь ос мот үсытныл мүй махум ёхталэгыт. Общинат рүпитан махум маңь павылквет оlnэ мир палт пил ёвтэгыт, ты тәнут элалъ Ханты-Мансийск үсн хүл щёпитан заводн кётыяныл, тот сәккарың пил пәнкат вәравет ос элалъ тыналавет. Общинат рүпитан махум тох савнүв оln сәлуңкве патсыт.

Суссылтап олум спорат савсыр хаништапыт рүпитасыт. Савнүв оln хумус сәлуңкв ос элалъ ёмашакв хумус рүпитаңкве эри, махум тот хаништавёсыт. Хаништапыт махум акв тәла вәруңкве лавхатасыт, атың тәнут ос ёмашакв юнтым пормас «Сделано в Югре» хансым нәпаклөмтыл ханлавет ос Россия янытыл манос мот хөн мāt тыналаңкве патавет.

Людмила ТЕТКИНА



Лемпино павылныл ёхталам хум

НЯВРАМЫТ МАҢСЫЛ

Хурит пöслум няврамыт янытлавёсыт



Н.М. Анадеева



Г.Р. Кондина ос няврамыт ханищтан нэ



Е.И. Потпот

Вят сәграпнал этпос 8 хөталэт Ханты-Мансийск музей-колэт няврамыт акван-атыглавёсыт. Та хөтал «Легенды Югорской земли» нампa касылт нөх-патум аҕиришит-пыгришит янытлавёсыт.

Ты касыл «Новости Югры» газетат рүпитан маныщи нэ Наталья Анадеева вэрыс. «Лүимә сэрипос» ос «Ханты ясаң» газетат рүпитан махум тавён ос нётсыт. 7-16 тал яныт няврамыт маныщи, ханты мөйтыт ос пёс потрыт щирыл катыл хурит пöслысыт.

Аҕиришит-пыгришит акв нэ-пак тармыл тара нила хурит вэрыс, руц латңыл тән «комиксыг» лававет. Рүпатаныл няврамыт маныщи, ханты ос руц латңыл хассаныл. Аҕит-пыгыт катыл пöслым яныгсат арыгкем хурит кётсыт. Ты хурит халт жури-хөтпат 29 ёмас, пұмышц рүпатат пёриясыт. «Новости Югры», маныщи ос ханты газетат рүпитан хөтпат, катыл хурит пöслан финка нэ Санна Хукканен, комиксыт пöслан нэ Анна Воронкова ос искусствоведыг өлнэ нэ Анна Лебедева жури-хөтпат олсыт.

«Новости Югры» газета күщай хум Владимир Меркушев няврамыт янытласанэ. Тав лавыс: «Түя порат Наталья Анадеева аномн лавыс, аҕиришит-пыгришит маҕсыл касыл вэруңке

таңхи. Төнт ам аты номсысум, насати, маныщи, ханты мөйтыл няврамыт пұмщалахтэгыт. Ам мәниг өлмум порат Анна Конькова хансум мөйтыт ловинь-тасанум. Мёңквыт, Эква-пыгрищ ос Мир-суснэ-хум туп маныщи мөйтыт өлэгыт. Матъёмас, ань яныгман няврамыт ты мөйтыт, потрыт ос вэганыл».

Наталья Анадеева няврамытн лавыс: «Ам сав тал «Новости Югры» нампa газета ляххал тотнэ хөтпаг рүпитэгум. Ватихал сossa махум палт ялантэгум ос тән олупсаныл урыл хансэгум. Ань акв тарвитың вэрмадь олы, щань латың ванэ хөтпат касың талныл мощцаг ёмтэгыт. Няврамыт щань латың вос ханищтэгыт, руцит ос мөт мирыт мән мөйтанув, пёс потранув ос вос ловиньтэгыт, ам таимәҕсыл ты касыл вэрсум».

«Ханты ясаң» ос «Лүимә сэрипос» газетат күщай нэ Галина Кондина тув ос вөвыглавес. Галина Рудольфовна лавыс, тав яныгмаме порат маныщит пуссын щань латңыл потыртасыт. Ань аҕиришит-пыгришит щань

латың туп школат ханищтэгыт ос латңаныл ёмашакв ат вэганыл. Няврамытын тав Мёңкв ос сөламат урыл маныщи мөйт тот мөйтыс. Тамле мұтраң мөйтыт маныщи махум сав өныщэгыт.

Маныщи няврамыт 13 рүпата кётсыт. Катыл пöслум хурияныл тән маныщи латңыл хассаныл. Ты хурит Саранпавылт, Хальүст ос Советский үст өлнэ аҕиришит-пыгришит пöслысыт. Касыл тох олыс: акв няврам таккёт хури пöслуңке вэрыс, манос акв хури пуссын аквёт пöслуңке вэрысыт. Маныщи няврамыт халт Зинаида Ванюта ос Кристина Хатанзеева 14-16 яныт няврамыт халт нөх-патсыт. 7-13 тал яныт няврамыт халт Карина Ларионова ос Ксения Таратова янытлавесыт. Николай Лелятов, Сергей Лелятов, Юлиана Рыжкова, Алексей Хатанзеев, Владимир Хатанзеев ос Елизавета Веселова рүпатаныл ос нөх-патсыт. Тән янытлан нэпакыл ос тының мүйлупсал кётвёсыт.

Нөх-патум маныщи няврамыт хурияныл мән маныщи газетан тах вэриянув. Мән, редакцият рүпитан махум, няврамыт янытлыанув ос сав ёмас, сымың латңыл кётыанув.

Людмила АЛГАДЬЕВА

Пёс накыт учёныитн осн-паттавет

Ты этпост «Мă-вит ос элумхōлас» намба музейт рӯпитан хōтпат «VIII Югорская полевая музейная биеннале» ханищтап вāрыгласыт. Ханты-Мансийскан 22 сāvсыр ўсытныл учёныит, архивытт ос музейтт рӯпитан хōтпат, ўст ханищтахтын мāнылат мāхум тув ёхталасыт.



А.В. Головнёв



Венгрия мāныл Акви учёный нē тот олыс. Хӯрум хōтал сыс ты вāрмалыт яныгсāt арыгкем элумхōлас акван-хōнтхатыгласыт ос ат янас ханищтахтын колнакытт рӯпата-ныл урыл потыртасыт.

Овыл хōталт мāхум пуссын акван-атыглавёсыт, тот тāн ётаныл культура департамент кӯщай нē Надежда Казначеева пащалахтас. РФ культура министерство пāлыл кӯщай вāнын нē Алла Манилова, тот музейт палт кӯщайлахтын нē Владислава Кононова ос Совет Федерация пāлыл Олег Мельниченко тāн кётум пищманыл ловиньтавёсыт.

Санкт-Петербург ўс-ныл ёхталам история наука доктор нам ош-нē учёный хум Андрей Головнёв потыртас. Тав та ўст Кунсткамера музейт рӯпиты. Хум лāвыс, «Мă-вит ос элумхōлас» намба музеюв тāнанылн сака мӯсты. Тот сыресыр пёс пормасыт ос нēпакыт олёгыт, тувыл кāсың порат йильпи суссылтапыт щёпитāлавет.

Тāн тāнки музейанылт нēматыр йильпи суссылтан ут ат вāрыглē-

гыт, туп сака пёс утыт сунсыглаңке мӯй мāхум ёхталёгыт. Хум Ямалт ос Югравт оlnэ сосса мāхум палт сāv тāl сыс ёхталāлы.

Сāртын лӯимāt оlnэ мирыт пōслах-туңке шар ат тахсыт, туйтыглахтым оlсыт, пёс оlупсаныл мōрсың порат хурин пōслувёсыт. Ань тай тамле тēла āтим, тāн мōт хōтпатн пōславет, тāнки оs пōслахтёгыт ос хоталь-āти ищхипың лōпс-утн хурияныл кётыяныл. Ань мāхум пуссын щёпт ошнэ телефон ёт оныщёгыт ос тāн-кинāныл пōслуңке вёрмёгыт.

Хум юи-пāлт Пенза ўс университетт рӯпитан история наука доктор-хум Владимир Первушкин ос «Мă-вит ос элумхōлас» намба музей кӯщай нē Елена Гомонюк, тāl сыс вāр-нē рӯпатанēн урыл потыртасыт. Ты элы-пāлт пёс порамасыт ошнэ колыт халт касыл олыс, мāхум наука мāгыс матыр йильпи тēла тāра вос паттысыт. Ань тот нōх-патум хōтпаг янытлавёсыт - тыи Мегион ўст оlnэ МАУ «Экоцентр» колт рӯпитан нē Александра

Мингалимова ос Елена Мешкова, тав Советский районт «Музей истории и ремесел» намба колт рӯпиты.

Тувыл ты ханищ-тапн ёхталам мāхум ат янас колнакн лāкквa-уртхатасыт ос сāvсыр потрыт хўнтлысыт, матыр йильпи накыт ёт кāсашёгыт ман āти, потыртасыт. Тōва-накт воритотсыт ос пӯмаш тēлат элалы китыгласаныл.

Сāv мāныл ёхталам хōтпат 51 сāvсыр потрыт ловиньтасыт. Тāн хōт-āти мāнь пāв-лың мāн, Нёрыт нупыл, пёс йис мāтын яланта-сыт ос тот маныр хаштāl тēлат вāщынтасыт, ань ты овылтыт потрама-сыт. Мӯй мāхум мāгыс мāнь кина-охсат сус-сылтавёсыт. Кит кинаг Хāльўс районт Лев Вахитов, удмурт хумн, пōслувёсыт. Аква-тэ яныгпāла саран хум ос тав апге урыл пōслувес, кина «Два Ивана» намаим олы.

Мōтанэ Евдокия Ивановна Ромбандеева, мāньщи учёный нē, Хослōхт самын патум колэ суссылтавес. Ты кина «Прощание с будущим» намаим олы. Кина пōслын мāхум

тув Татьяна Дмитри-евна Слинкинан тотыг-лавёсыт. Ты туи Хослōх пāвыл такем витн āмa-рāлыма, моторхāпыт нālми вāтат ўнлын кол āвисўнтын пāг-пӯхталасыт.

Овлёт ты кинаг Овылтыт му-зейт рӯпитан нē Лa-риса Поршунова по-тыртас. Тувыл кина сусманыл юи-пāлт мāхум китыглахтасыт, пāвыл хōт олы, картат тав нēмхōт хансым āтим, ос хосат тāгыл тох āмарāлаве ман āти, манах хōтпа тот тālэ-тувёт олёгыт.

Венгрияныл ёхталам нē Эстер Рутткаи акв венгр хумн Антал Реру-ли овылтыт потыртас. Тав пёс пора мāньщи мōйтыт, потрыт нēпакн хансыс. Ты элы-пāлт Эстер лӯсум мāньщи-нaв палт Свердловский областн ялыс ос Полу-ночный пāвыл музейт суссылтап вāрыглас. Екатеринбург ўсныл ёх-талам хум Илья Абра-мов хурит суссылта-ке ўсувн тотыглас. Ам тав ос венгр нē овылтыт янас потыр хансёгум тах.

**Тамара
МЕРОВА**

Тав нэпаканэ ловиньтавет

Ханты-Мансийск үст округ библиотекат яныг таквс этпос 29 хөталэт «Югра ловиньты» намба конференция ылыс. Руц латңыл тох намаим ылыс: «Манрыг ам Еремей Айпин хансум нэпаканэ ловиньтыяну».

Ты элы-палт округувт касың районт ос үст мәнъ таквс этпос 15 хөталыңыл ты этпос 12 хөталэ мус тамле конференцият вэрыглавэсыт, ос хотьют таңхыс, ты урыл потыр кетуңкве тув вэрмыс.

Округувныл савсыр маныл тыг налыман рупата кэтыглавес, мак емас потрыт ань конференцият хунтлавэсыт. Ты тал нэпак хаснэ Ас хум Еремей Данилович Айпин 70 талэ төвлыс. Тав намхөталэ кастыл округувт савсыр ловиньтапыт, конференцият вэрыглавэсыт. Таимэгыс ты конференция потре тох намаим ты ылыс.

Конференция ылыс-палт «Акань театрыт» тэлыглахтын хум Александр Михайлович Алексеев «Харыплан арац ватат» Е.Д. Айпин хансум нэпакэныл акв потырохса ловиньтас. Ётыл паща латың Еремей Данилович Айпин ос округ библиотека кұчай нэ Ольга Михайловна Павлова лавсыг.

Е. Айпин атхатам мирн лавыс: «Тыи сака емас – мән учёный махманув, няврамыт ханищтан хөтпанув нэпакыт ловиньтэгыт, ловиньтам утаныл урыл танкирот номсахтэгыт ос тувыл номтыңыш потыртэгыт. Тан ма янытыл ылыс ос Югра ма литература эруптэгыт, ати туп ам хансум нэпаканум ловиньтыяныл».

Овыл доклад Виктория Львовна Сязи, Ас-угорский мир институтыт рупитан учёный Ас нэ ловиньтастэ, тав потре «Е.Д. Айпин хансум нэпаканэ ос Ас мире олупсатэ». Еремей Данилович мире пёс йис олупса ос Най-Отыранэ урыл нэпаканэ нэт ёмщакв хансыс. Хотьют тав потранэ ловиньты, тара-патты, хумус Ас мире ань ылы. Е.Д. Айпин ханты писателит халт щар өвлэт яныг роман-потрыт хансуңкве ылыс-тахтас, тав кит яныг нэпак хансыс: «Ас махум



манос алпыл сэрипос сове» («Ханты или Звезда Утренней Зари»), «Төрүм Шань келпың туйтыт» («Божья Матерь в кровавых снегах»).


Това докладыт махум ищхипың ут хосыт ловиньтасыт. **Светлана Ивановна Рандымова** Белоярский

район библиотеканыл ловиньтас. Такви Касум павылт ылы, тот библиотекат рупиты. Тав Е.Д. Айпин хансум нэпаканэ хосыт «Амки мам хунтлылум» намба литературный гостиная Касум павылт вэрыглам, ань та урыл потыртас.

Тан павлың мираныл, няврамыт пуссын акван-атыгласаныл, хотьют касащас, доклад ловиньтас. Яныг махум ос потыртасыт, хумус пёс порат няврамыт янмалтавэсыт, танки олупсаныл урыл, хумус олсыт, тувыл ос махманыл хотталы тотым ос наскэсыг порсылм пора урыл.

Надежда Михайловна Балуева, Октябрьский район библиотекат рупитан нэ, «Еремей Айпин олупса ятэ» («Река жизни Еремея Айпина») краеведение урок урыл потыртас.

Сака емас потыр Нижневартовск үсныл **Тамара Трофимовна Зуева**, нэпак хаснэ нэ, ловиньтас. Тав потре «Витуй рутныл ылыс нэпак хаснэ хум» намаим ылыс. Тувыл Аган павылт школат няврамыт ханищтан нэ Лариса Александровна





Минеева «Манрыг ам Айпин нэпаканэ ловиньтыяну» та урыл потыртас. Тав суссылтас, хумус Айпин потранэ ловиньтаманыл юи-палт тән нэврамыт ёт мультфильм кина-охсат пöслэгыт.

Нина Васильевна Шабаршина, Ванзеват павылт библиотекат рүпитан нэ, Е.Д. Айпин нэпаканэ хосыт «Өлнэ мав мўтратэ» хансум потре ловиньтастэ. Тав потыртас, павлың библиотекат «Айпин нэпаканэ ловиньтэв» ловиньтап хумус вэрыгласыт. Яныг махум, нэврамыт, касың хөтпа Еремей Данилович нэпаканэныл суиңыш потыр-охса ловиньтасыт. Ханты-Мансийск үст өлнэ хум **Андрей Иванович Лонгортов** «Хотан эрыг» потыр урыл потыртас.

Полина Пилипцева, Когалым үст ловит классыт хаништахтын аги, «Е. Айпин «Төрүм Щань келпың түйтүт» романт Ас махум олупсаныл суссылтан урыл» потыр ловиньтас. **Артур Данило**, Ханты-Мансийск үст ловит классыт хаништахтын пыг, «Нотың мўтраң суй хўнтлуңкве...» («Внимать мудрому голосу вечности...») потыр ловиньтас.

Потре пўмыщ өлыс,

тав өвлэт лавыс, тав Ас пыг, оматэ, анэкуватэ, ащойкатэ – тән пуссын Ас махум. Потыртас, хумус ащойкатэ мань порат ащтал хулытыс, хунь аще хотталы тотвес. Тувыл такви потре ловиньтастэ. «Манрыг ам Айпин нэпаканэ ловиньтыяну? Тав манав олункве ханищтыяна», – акв латңе тамле өлыс.

Покачи үст «Меди» намба нэпак таратан колт корреспондент нэ **Людмила Сергеевна Голубева** «Яныг вөрпыг» потыр ловиньтас. Юи-өвыл потыр **Наталья Александровна Алексеева** Ханты-Мансийский район Батово павылт школат нэврамыт ханищтан нэ потыртас, потре «Е.Д. Айпин «Төрүм Щань келпың түйтүт» нэпак хосыт сочинение өлыс. Тав потыртас, хумус нэврамыт ты нэпак ловиньтыяныл ос тулыглап вэрэгыт.

Конференцият поткрыт хўнтлуңкве пўмыщ өлыс, округувт өлнэ савсыр мир Е.Д. Айпин нэпаканэ хумус ловиньтыяныл, маныр ты урыл номсэгыт. Тот ловиньтым потрыт янас нэпакыг тах таратавет.

Альбина СТАНИСЛАВЕЦ

Эргын, ййквнэ хөтпат урыл

Ювле хулытум этпост Сургутский театрыт рүпитан махум Ханты-Мансийск үсн эхталасыт. Тән мөлалунав мөт хөн ман мўйлуңкве ялсыт. Та мат сав хөтпанув өлэгыт. Тән магсыланыл концерт суссылтасыт.



Ты ёнгынколт кўщай нэ Тамара Лычкастая ос тав этэ рүпитан хөтпат ювле эхтуманыл ты урыл мощ потыртасыт. Сургут үс театрыт рүпитан махум 17 хөтталныл 25 хөталэ мус Германия мат Берлин үст мўйлысыт. Ты порат тән атыт щес тув ялсыт. Ты вэрмаль магыс культура ос общественный ос внешний связь департаментыт рүпитан махум тананылн яныг нётмил вэрсыт.

Мөт хөн мат артистыт руш мөйтыт щирыл спектакль суссылтасыт. Нэврамыт магыс стихыт ловиньтасыт. Ты стихыт ос потрыт хўнтлуңкве онтырсаткем нэврам Берлин ос мөт ўсытныл эхталасыт. Тән пуссын руш латңыл потыртаңкве хасэгыт, тот школат ханищтавет ос юн потыртэгыт. Щаняныл-ащаныл хуньт Россия маныл тув вантлысыт.

Ань ты фестиваль касың тал щёпиталуңкве патаве. Ты вэрмаль тот өлнэ руш мирн сака мўсты. Матёныл магыс касаныл сака холас. Руш махум касалэгыт, тән номтаныл ёмасыг ёмты. Ань ты тэла акваг элалы тотуңкве тән ты сака вөвсаныл.

Ман артистанув мөлт ты тал тув ялсыт, ёт ұльпа пэквыт тотыгласыт. Фестиваль ойгпам юи-палт тән касың хөтпан пэкв мўйлуптасыт. Нэврамыт пуссын щэгтым хулытсыт.

Руш хөтпанув ёт ты концерт сунсуңкве немец ос итальянец махум эхталасыт. Тананылн ты тэла ос сака мўстыс, щэгтым катпатта ратсыт. Тот ты ёнгын кол эрганыл, ййкваныл магыс сака янытлавес. Ань тән мөтыт тал ос яныг щэгтыл тот ўруңкве тах патавет.

Николай МЕРОВ

Округувт пұльницат мұсхалыг щёпитавет

Мирн нётмил вәрнэ департамент колт рұпитан махум округувт олнэ пұльницат урыл ляххалыт кётсыт. Ань ұсытт ос павлытт мир пусмалтан вәрмалъ щирыл маныр рұпата варае, ты тэллат урыл потырт хансым олыв.

Нягань ұс яныг лёкар Ирина Лазарева няврамыт хопсы агмыл ёмтнэныл урыл потыртас. Ты тәл яныг таквс ётпост тот ватахкем няврам хопсы агмыл ёмталасыт. Ват сәграпнал ётпос овыл сәт хотал сыс ос лов аги-пыг ты агмыл илямтәлвёсыт. Тәл сыс пуссын аквёет нёлсәт акв няврам ты агмыл ёмталасыт. Тән пуссын юн олыв пусмалтавёсыт. Тыммагыс кұщай нэ оматн-атятн тох лавыс: «Ты агм элалъ ул вос миная, мән пұльницав эрнэ тәрпил ос ищхипың утыл тастым олы. Махум акваг уральтыянұв ос эрнэ тәрпил хансыянұв. Лёкар такви рұпататэ лёлъсаң вәритэ ке, хотпа ёт воритоты ке, пұльница кұщайн ты урыл тәра потыртән. Аквёет ты тәрвит мұсхалыг щёпитылұв».

Сургут ұс №1 пұльница матум хотпат ёт рұпитан лёккарыт пусмалтахтын махум холестеринаныл, кёлпаныл, сыманыл, ұлш пұнканыл ос мот утаныл уральтасаныл. Матахмат хотал сыс яныгсәт элумхолас ты пұльницав ёхталас. Касың хотпа уральтахтаме юи-пәлт картал майвес. Та картат ёмашакв лылтнэ магыс хумус нёнсалахтункве эри, маныр тәнүт тәпьялаңкве ос саманыл давление хумус хот-виңкве, лёккарыт хұлтнэ потыр хассыт. Ты рұпата пұльницатт таиммагыс варае, махум сәв тәл пұстагыл элалъ вос олэгыт.

Тот рұпитан лёккарыт ос пусмалтахтын махум хохса хартункве ат тәртавет. Хохса хартнэ паттат ос сәвсыр тәрвит агмыл ёмтэгыт, ты урыл мирн акваг



Нягань ұс пұльница

потыртаве. Лёккарыт танки халаныл сәвсыр касылыт щёпитәлэгыт ос щёмьяң тәгыл вәтихал ёнгыт вәрыглэгыт.

Элумхолас пұнквалум ханищтан Уральский институтт рұпитан хотпат Нижневартоск ұс округ пұльницат рұпитан лёккарыт магыс хұлтыглан ханищтап щёпитәлсыт. Тот тән ищхипың ут хосыт потыртасыт, хумус эрнэ щирыл операцият вәруңкве эри.

Тувыл ты тәл лұпта ётпост Сургутский район Белый Яр, Солнечный ос Барсово павлытт олнэ пұльницат хот-щёпитаңкве овылтавёсыт. Ты пусмалтахтын колыт пуссын пёсыг ёмтсыт. Ань колнаканыл посыңыг ос йильпииг щёпитавет, махум тот мұсхал щирыл уральтаңкве патавет. Йильпи тәл кастыл ты рұпата астае тах.

Нефтеюганск ұс пұльницат рұпитан лёккарыт ос МЧС махум 12-18 тәл яныт няврамыт магыс ос ханищтап

щёпитәлсыт. Тән ты няврамыт илттыг хотум ёмтум хотпан нётункве ханищтасаныл - ты щургын кёлп ёлпөилттәңкв, элумхолас лылытэ нэгылттаңкве ос агмың хотпа пұльницав тотнэ порат хумус пинункве рөви. Төнт ты ханищтап Нефтеюганск, Великий Новгород, Воронеж ос Тула ұсытт вәрыглавес.

Ос акв ёмас вәрмалъ, ань Лангепас ұст «Земский доктор» нампла программа ёмшакв рұпиты. Ты тәла щирыл мәнәлат лёккарыт павлытыт рұпитаңкве кәсащёгыт. Ань тот олнэ пұльницав нилахуйплов лёккар рұпитаңкве ёхтыс. Тувыл ты вәрмалъ хосыт Сургутский район Локосово павыл пұльницав ос кит фельдшерыг рұпитаңкве вуйвесыг. Ты элы-пәлт ат төвылхатам хот эрнэ лёккар тув пирмайтавёсыт.

Ты потырт мәнәщи ләтңыл Николай МЕРОВ хассанэ.



Сургут ұс пұльница

Ёрнколт яныгмам мащтыр нэ



Надежда Алексеевна Гришкина
ты тал атпан нупыл ат талэ
төвлыс. Нэ щёмытэ ёт Тугияны
павылт олы. 2012 талт Надежда
Алексеевна «Народный мастер
Югры» намыл майвес.

Мён тав ётэ Ханты-Мансийск үст «Төрүм Маа» музейт потра-масмён, таве китыглас-лум, хөт яныгмас, мащтырлаңкве хөт ханищтахтас. Нан ань элалэ нэ потре ловинь-тэлын.

– Ам Касум павылт, ханты колтагылт са-мын патсум, 1973 тал яныгполь этпос 13 хө-талэт. Атям хул алыш-лас, воряс. Омам акваг матыр юнтыс, мащ-тырлас. Ам ос мань-тагыл юнтуңкве патсум, омам ляпан үнтэгум, сунсэгум, хумус тав щакв-щи. Матыр-ати воруң-кве тох лащал-лащал та ханьшувласум.

Щанягум-ащажум салыт ошсыг, салыанув үрим Сургутский район Ляма я толихт сав тал яласасүв, салыңколт олсув. Атям яныг кол-тагылт самын патыс.

Опам Михаил Лозя-мов яныгсат арыг

тал олыс, экватэнтыл китхуйплов няврам ошсыг – хум нявраманэн халт туп акв аги самын патыс. Пыганэн пуссын эргын-ййквнэ ос тулыг-лахтын хөтпаг яныг-масыт.

Үй ййквнэ порат тан пуссын тув минэгыт. Пёс потыр вагыт, ханты эргыт, мөйтыт, амщит, тот та тўлыглахтэгыт, ошхулытэгыт.

Ам ань акв агим ос тан хольтаныл ййкви. Маньтагыл ййквуңкве патыс, нэмхотьютн ат ханищтавес. Ань ййк-внэ-эргын махум ёт хөт-ати яласы. Ты тал Москва үс мус ялыс, тот хөт ййквыс, хўрмит местал майвес.

– **Наң омагын-агыгын ёрнколт яласасыг?**

– Ати, атям 2005 талт атымьг ёмтыс. Омам Касум павылт олы. Ам ойкам Георгий Матвеевич Гришкин Ту-гияны павыл хум. Хунь акван-минасамён, тав павлэн вантлысум, тот ват нупыл китыт тал ты олэгум. Тугияны павыл ам сака эруптылум, нётнэ макве, ёмас ма-хум тот олэгыт. Пыг ос кит аги оныщимён. Нявраманмён ос ма-тыр мащтырлэгыт – пы-гумён ййвныл савсыр хурит вәри, агиягмён юнсхатэг, сакныл матыр хартэг.

Ам мөйт ванэ, эрыг ванэ махум халт яныгмасум, щань лат-нумтыл сав потыр, мөйт хулыгласум. Ань нявраманум нупыл акваг потырталэгум, махманув хумус олсыт, ман хумус яныгмасүв, манхурип рупата вәр-сүв. Касум нэт паквпа-

лың супыт юнтэгыт, Тугияны павыл ёрт ол-нэ нэт ос юи суп, тувыл төр сахи юнтэгыт, сав-сыр мань хорамыл, паквпалыл юнтыяныл.

Надежда Алексеевна суп юнтнэтэ конь-пал, совныл лагыл мас-нут юнты, сётапыл шулкиныт саги, сакныл хорамың турлопсыт, пальсакыт ос мөт пор-масыт харты. Ты мащ-тыр нэ матыр-ати вә-руңкве, савсыр ширыл щаквщүңкве пуссын хасы, пуссын вөрми.

Округт ос Россия янытыл олнэ мащтыр махум магыс вәрыглан хөнтхатыглапытн ос суссылтапытн тав акваг вөвиньталаве. Катыл вәрум пормасанэ сус-сылтыянэ, мөт махум ёт вайхаты, потрами, ханищтахты.

2002 тал пәсныл Тугияны павылт «Род-ник» нампa мащтырлан ос эргын-ййквнэ колт пуңктоты. Тот тан, янге-мане, матыр вәрэгыт, юнсхатэгыт, щаквщё-гыт. Надежда Алексеев-на няврамыт ос маньлат махум ёт рупиты, акваг ханищтыянэ, матыр вәруңкве хасэгыт те, сав вос рупитэгыт, ат те хасэгыт, вос ха-нищтахтэгыт. Төнт ном-таныл тэлаг ёмтэгыт, матыр вәруңкве тах хасуңкве патэгыт.

Надежда Алексеевна тамле нёмса нэ, сымың элумхолас. Қасың хөтпа янытлытэ, нётуңкве эри те, нётытэ. Таимагыс тав павыл махманэн янытлаве, ёмас латңыл, сымың латңыл лававе. Ты ятил нэ пус кат, пус лагыл вос олы, Най-Отыранэн вос үргала-ве.



**Светлана
РОМБАНДЕЕВА**

Ащирма ойкат үсүвт мүйлысыт



Ишхипы магым хури

Вāt сәграпнал этпос сатыт хөталәт Ханты-Мансийск үс котилыт йильпи тәл әхтын кастыл савсыр мәныл Ащирма ойкат Снегурочканыл эт акван-атхатыгласыт. Ты тәл мак яныг Ащирма ойка Великий Устюг үсныл китхуйпловит щёс тыг әхталас.

Мүйлын хөталт тав тыт өлнә махум эт пащалахтас. Йильпи тәл әхтын кастыл пуссын мир янытласанә ос хөвт хорамың нәянә та пәламласыт, тав махум нупыл лавыс:

«Анумн тыт мүйлуң-кве сака мұсты. Үс котилыт сав хөтпа атхатсыт. Касың щемьят щәгт ос щунь вос ылы. Элалы өлнә хөталыт маныр үрегын, таи нан колын вос әхты. Нявраманьн пустагыл

вос өлэгыт. Йильпи тәлт туп ляпа рутанын эт таглың пасаныл, атын тәнутыл мүйлән!»

Махум тот Ащирма ойкат ос Снегурочкат эт пөслахтысыт. Яныг хөтпат ос няврамыт катаныл акван-пувим йиквим ос әргим яныг хөвт мувлахи ёмыгтасыт. Үс кант хөвт нөтнә нәил хоргыс, тот яңкныл савсыр хурит вәрвөсыт.

Ань ты вәрмалын яныгсәт вәт әлумхөлас, пуссын аквәт вәт нупыл акв команда тыг әхталасыт. Тән Челябинский областьныл, Татарстан мәныл, Ямало-Ненецкий округныл, ты коньпал Китай мөт хон мәныл махум ос тыт мүйлысыт. Округуныл ос Октябрьский, Белоярский, Нефтеюганский районьтныл, Нижневартовск, Когалым, Нефтеюганск, Урай, Сургут үсытныл олсыт.

Молты тәл Сургут үс

Ащирма ойка ос Ханты-Мансийск үс Снегурочка нөх-патсыг. Ань ты касылт Ащирма ойкат няврамыт эт мүйлын вәрмалы щөпиталсыт ос әргыт әргысыт. Китай мәныл әхтум Ащирма ойка ты кастыл намыл руц әргыт ханищтасанә. Тыт Сургут үсныл нөх-патум Ащирма ойка ос Оренбург үсныл Снегурочка ань Париж үсн үщлахтын магыс путөвқа-нәпакыл ос сувыл мүйлуптавесыг. Ты сув Великий Устюг үсныл әхталам Ащирма ойка кұщай тав мүйлуптастә.

Вәт сәграпнал этпос 7 хөталныл тәл котилыт этпос 7 хөталә мус Ханты-Мансийск үст мүй махум магыс культура колыт, музеит, каснә колыт рүпитаңкве патэгыт. Үс ос мүй махум тот үщлахтүңкве вөрмөгыт.

Николай МЕРОВ

Ты этпос 15 хөталәт А.И. Сайнахова әтимыг ёмтыс

Мәньщи учёный хөтпав Анастасия Ильинична Сайнахова 1932 тәлт вәт сәграпнал этпос 16 хөталәт Хальүс район Мәнья павылт самын патыс. Ты павыл Саранпавылныл алгаль Мәнья вәтат үнлыс.

Анастасия Ильинична филологический наука кандидат ос профессор намыл маим олыс. Вәт арыгкем научный потрыт хансыс. Ты коньпал тав мәньщи ос руц ләтңыл потрыт, мөйтыт ос стихыт

хансыс, нәпакыт тәратас. Тав вәрум тәланә ханищтапын ос наукан яныг пәрыс тотсыт.

Юи-өвыл хус тәл Анастасия Ильинична колтәглә эт Ханты-Мансийск үст олыс. Тав акв әги оныщис, Динаратә хұрум няврам янмалтас, тән ань пуссын яныг. Намың-суиң мәньщи хөтпав намхөталә мус туп акв хөтал ат олыс. Ань ты этпос 16 хөталәт тав 86 тәлә төвлынув.

Мән, газета вәрнә махум, тав әтимыг ёмтме магыс сыманув сака щәргөгыт.



Лүймә сәрипос

(Северная заря)
№24 (1186), 20.12.2018
Соучредители
Дума, Правительство
Ханты-Мансийского
автономного округа – Югры
Издатель
Департамент общественных
и внешних связей Ханты-
Мансийского автономного
округа – Югры

Редакция

Врио директора –
Кондина Г.Р.
Телефон (3467) 33-22-72

Заместитель гл.редактора –
Кондина Г.Р.
Телефон (3467) 33-22-72

Ответственный секретарь –
Узель В.В.
Телефон (3467) 33-23-09

Адрес редакции и издателя:
628011, г.Ханты-Мансийск,
ул.Комсомольская, 31
тел./факс (3467) 33-17-52

Е-mail: gazeta@khanty-yasang.ru
Газета размещена на сайте
www.khanty-yasang.ru

Отпечатано:

ООО «Новости Югры-
Производство» г. Сургут,
ул. Маяковского, д. 14.

Индексы 04399, 54399

Тираж 1710 экз.

Заказ 5054

Цена свободная

Мнение авторов
публикаций не
обязательно отражает
точку зрения редакции.

Газета зарегистрирована
Управлением Федеральной

службы по надзору
в сфере связи,
информационных
технологий и массовых
коммуникаций
по Тюменской области,
ХМАО-Югре и ЯНАО.

Свидетельство
о регистрации
ПИ №ТУ 72-00795
от 23 января 2013 г.